

**Maki Nalua Naña Pol Siri
Pa Pan Li Nalelagaena Wa Lala
Nae Garu
KOREN
Visayuena Na Tusi Nene**

Komþasnen suniena plas na tusi nini

Maki na lua nene naña Pol siria pa li nalelagaena lala nae Koren, ana naga siria e pogos naña pane ke pogos m̃arera amio li nalelagaena lala e sum̃are nene nae Koren, naña laþasia sinela kar manene naga paþisi, ana akawelan naga. Ana Pol kila mareravan panila sape naga kiena sitomiena m̃arera ke na wa vena kila ruruen napiowaena nene. Naga sinenan sape naga amio la aimi ave erau wo sina, ana pisawal panila pisape kerara paþisi naña amlogear naga.

E komsusnen m̃aki na sumo Pol pisayu komin yane naga pis m̃arera e m̃aki na sumo tai naña siri pa pan la. A pisa naña naga kerara paþisi naña mloge sape apilon kiela sitomiena komin kiela milamulena viowa lala, a kila ruru napiowaena la naña sike pula, ana ape erau wo sina amio.

A siraunia, pisa panila sape monar akuwan kilavaru vena waren van kiela erau na lelagaena lala nae Yutea, la naña pe kiela sur re poli. E komþasnen luwasnen m̃aki nene, Pol pis m̃arera pa yaru la þas nae Koren naña la asape ape li nalologena wo kemua lelaga, ana asuñã akila

kare li nalelagaena la nae yo nene e kiela vianiena la naþa pe mesmesu re poli. Asumã apisa ke asape Pol naga pe nalologena kiena ne re Yesu Kristo lelaga poli, þisi na Pol pis mñarera vena suwoyon laena, a kila meraravan sane naga pe nalologena kemua lelaga kiena ne Yesu Kristo.

Komþasnen tusi la nini

Visena þesa 1:1-11

Pol amio li nalelagaena lala nae Koren 1:12—
7:16

Kilavaru naþa na warena va li nalelagaena lala
nae Yutea 8:1—9:15

Pol kila meraravan naþa naga pe nalologena
kemua lelaga 10:1—13:10

Visena maro 13:11-14

Visena þesia

¹ Erau lala, inu Pol nemio kieta puruvi naþa Timote; imimi lua mekekanan naþa mevitawe amiu sina e mñaki nini, nane amiu sumãare kiena ne Ntewa e pupia kumali nae Koren amio mñena li na lelagaena taþena lala naþa asutetai asike e pupia lepas naþa Kris.

Ntewa kiena nasinenanena, naga pisirlua inu Pol vena neim sane nalologena tai kiena ne Yesu Kristo, kila narui kiau suri moki naþa nevisawal van amiu e mñaki nini, ana sumon nanene, ² nevisa sanini nevisave kiau leniena nesape yoko Ntewa Arimata amio Suþe Yesu Kristo aligan lemamiena a sumãarena, lalua asike e amiu punu ga.

Pol pisa potena pan Ntewa vanon kiena sinewoena

³ Sineun manene pañisi neyeluar kieta Ntewa nene naña naga pe Arimana kieta Supe Yesu Kristo, a naga pe Arimata nowo tai naña naga pe purpes nen p̃elaga na sineyeena, a naga pe Ntewa nowo tai naña naga pulen p̃elaga na kila luṗeluṗeena. ⁴ Pogos ya naña visae tewane pog m̃arera, Ntewa sum̃a kila luṗeluṗe ita ruru nenaga, ana kila tom̃arera ruru sina ga. Ana siraunia, tekilia tela p̃elaga na kila luṗeluṗeena naña naga kila pan ita, tekila towe va kieta erau taṗena lala naña apane ke kiela pogos m̃arera lala, teiila la sanene.

⁵ Pe lelaga pañisi sane pogos moki tesum̃a ga toṗar ke naloge viowaena maran taaga sa naña Kristo p̃aria, ana naga kila naña tekilia towar m̃ena kiena kila luṗeluṗeena nowo lala.

⁶ Pogos naña mepane pog m̃arera lala, metam̃an ga narui, vena kila sane amiu akilia aloge wo a alual malena. A pogos naña mevisu sane Ntewa kila luṗeluṗe imimi, naga m̃ena ga po pañisi, komin naña kila sane imimi m̃ena ga mekilia mekilu luṗeluṗe amiu sina ga, a mekilia meiila amiu vena akila kiamiu sitomena ve piavi vena akilia awar ro e napiowaena la naña amiu m̃ena ga akilia alualia. ⁷ Mesitomiyu ya naña amiu aṗarpooyo e p̃isi rui, kila sane e lepas na pun amiu, pe kiamimi sitomena kurkur re nenaga, sane yoko amiu na ve sanape. Nanene komin naña imimi mekilia ruru p̃isi rui sane pe sur korena naña amiu monar avisu naloge viowaena maran taaga sa ke naña mepisuia, ana yokorena

amiu akilia atol m̃ena ga pupia kila luṕeluṕeena kiena ne Ntewa ve sa ke ga naṕa imimi metolia.

⁸ Pona pe amloge kilia ruru re poli yo wa, e pupia pogos naloge viowaena lala naṕa mepisua pogos naṕa mesuṃa memiyuṃae kar ke ga e pupia lepas nene naṕa Esia, ana nekilia nevisa nevisave piowa na piowa paṕisi. Sur la urmi manene la pan imimi, imimi pe metorokin la re si poli, pano pano-o mesitom mesape naga narui monar kiamimi luas nen malena narui.

⁹ Lelaga, memloge sa naṕa visae yerkawa na kumali tai visawal visave awe moṃar imimi memarmare, yoko mevisu sane sa ve sanene na wo laa sane, komin naṕa mepisu rui sane taṕatete si mekila sur tai, moṕasine imimi ṕele sina mesape yoko imimi moṃarera ve sanape. E pogos nene, memligan kiamimi malena sike ga e limana Ntewa, moṕasine ga naga komin naṕa naga taaga ga pe Ntewa naṕa kilia kila yaru naṕa mare imi mali sina. ¹⁰ A moṕasine naga sanene, mepisu naṕa pe lelaga paṕisi naṕa naga tamalia imimi, a nagane kiamimi sitomena ṃarera ruru po sane naga kilia tamalia imimi sina, pe yam taaga re ga poli, ana yoko naga suṃa kila lue ga silaga.

¹¹ A monar amiu aiila imimi naṕa asitoṃal imimi silaga e kiamiu leniena lala. Sa nene, pogos naṕa Ntewa loge kiamiu leniena moki nene, yokorena visa ruru imimi narui, tamalia imimi sina vetan pogos ṃarera la nene, a yoko amiu ve moki avisa ga potena vaṕisi va naga vanon ya naṕa yoko naga kila van imimi.

Pol pisa meraravan ruru sur naña kila naga pe pimi mialiali la re si poli

¹² Mořar naloge viowaena la sanene, ana sur tai suña naña kila imimi memloge pon imimi pařisi. Nane sitomena tai naña teke e imimi naña pisa sanini, sape e lepas na kiamimi řelaga e maramiu, a e maran yeririna tařena lala na yomarava nini, mekila sur make ga pe wa ruru nenaga, a kiamimi malena pe lelaga nena na po, sa naña Ntewa sinenania. Pe memiyuñae re memio sitomena na yomerava nini poli, ana memiyuñae ga memio lemamiena kiena ne Ntewa. ¹³ Sur make ga naña mesiriyuia e kiamimi mñaki la nini, naga pe sur la naña mekilia mesape aulo woga, a mekilia mesape akilia aulo kilalea. Ana visae sur lañas naña amiu akilia ga komřasa, sineun nesape e legiena la ne pimi ke ne, yoko monar akilali naña akilia ruru make la ga. ¹⁴ Visae ve sa nene, pogos naña ita punu tesike lele taaga e legiena keviu nene naña Suře Yesu wasuře sina, ana yoko amiu akekaran imimi vařisi a imimi mñena ga mekekaran amiu vařisi.

¹⁵ Ana komin naña nekilia ruru nesape sitomena wo na sanene sike likan ita rui, sineun manene nesape pogos naña neva e lepas nene Masitonia, yoko neiñasun noñalivin amiu.

¹⁶ Lelaga, nesuña nesitom ke nesape neiñasu nokom pun amiu yam ve lua, nařesia e pogos nene naña nesuña nepa ke Masitonia, a yam ve lua nena e pogos naña nořasuře inu, naña

nesitom nesape amiu akilia aligan ruru inu e kiau mrapa vena nowasuŕe si neva Sutea, ana peraga. Sineun nesape nekila wo van amiu sanene, ana sa naŕa akilia rui, taŕatete nekilia nekila.

¹⁷ Ana sineun nesape amiu monar akilia ruru sane pogos naŕa nesitom ke nesape neimi pun amiu, naga sur tai naŕa sineun manene paŕisi nesape nekila, naŕa kiau sitomena m̄areran paŕisi ve na kilaena. Naga pe pe sur re tai naŕa kiau sitomena peve lua e poli, naŕa nesitom ke nesape yoko nevano pona ve neva re. Peraga, inu na pe nesa re yeririna taŕena la poli, naŕa taŕatete olelaga e kiela visena, ¹⁸ ana sa naŕa amiu akilia awasine ga visena kiena ne Ntewa, akilia awasine m̄ena kiamimi visena. Kiamimi “Ore” pe kana kinas re naŕa asape “Peraga” pona “Ana yo,” ¹⁹ ana pogos naŕa mevisape “Ore,” naga “Ore” ga. Monar meve lelaga sanene, vena meve maran taaga memio narina Ntewa, Yesu Kristo, naŕa imimi telu Silvanus amio Timote mepimin memlologon pan amiu nanua rui. E pogos nene mepisawalia mesape kiena visena make ga pe lelaga silaga, komin kana “Ore” pe “Ore” nena napo, ²⁰ a navisaarena make ga naŕa Ntewa pisawalia e lepas kiena ne Yesu, pe tai re naŕa pimi sane pe navisokanena poli, ana punu ga pe lelaga. Sur ne nanene kila sane pogos naŕa tesuŕa temlen pa Ntewa, e kana nasiarena pitomi tol naŕa tepisape “Sanene,” tekila ga e kia kiena ne Yesu Kristo. ²¹ Kristo ke nanene narui naŕa memlologon pan amiu, a Ntewa ga

pisirilua imimi pe na kilaen kiena yuũaena. A amio naga nene, Ntewa kila imimi memio amiu, ita punu ga tepim lele taagania. ²² Ntewa kiar ita tepe kiena, ana naga mligan Ninuna e losineta, sane navisaarena tai naņa sape yoko temio naga e pogos la naņa sumņa pimi ke ne.

²³ Kieta Ntewa nene naga pe lelaga silaga, a naga kilia iila visena nene naņa sineun nesape nevisawal van amiu. Sane nanua ne nepisa mņa nesape yoko nomļalivin amiu gar Koren nene, ana siraunia pe nepimņas re si poli, a pona asitom piowagan inu e yo. Ana nesape nevisa van amiu naņa pe vanon re kiau sur tai poli, ana vanon amiu ga, komin naņa nekilia nesape visae neiņasu yoko monar nevis mņarera van amiu komin kiamiu pļelaga laņasia. Ana pe sineun re nesape yoko nekila amiu aloge viowa poli, nane kila sane pe nepim re si poli. ²⁴ Nepisa pan amiu sanene, awis monar ve asitom re avisave mesitom ke mesape mesike metavan amiu, vena meve pļarun kiamiu lelagaena. Pe sa re nene poli, ana sinemimin mesape teyuũae ga lele taaga, vena kila amiu akilia aloge wo silaga, asumļalu ruru mņarera ase kiamiu naviawaena.

2

¹ Sa naņa nepisa, nanua nepim sumo, sur laņasa sumņa ga naņa monar nepis pan amiu panon narui, ana kila amiu amloge piowagania. Ana nagane pe sineun re neim nekila amiu aloge viowa yam si tai poli, a sitomena ne nanene narui kila sane ve neiņasu nakaten amiu re sumo wa. ² Visae neiņasu nevis van amiu,

nekila aloge viowa, yoko inu mēna ga neloge viowa, ana pogos naṗa ita punu ga teloge viowa sanene, yoko taṗatete si naṗa tai kilia iila tai vena loge wo sina. ³ Sitomena ne naga nene naṗa nepisa ṗesan e m̄aki taṗena naṗa nemligan piṁasu nanua rui. Sineun nesape akilali akila ruru sur viowa la nene sumo wa, vena kila sane visae pogos naṗa neiṁasu, yoko ve sur re si tai sike likan amiu naṗa monar neloge viowagania. Ana visae akila ruru kiamiu yuṁaena wo, yoko nekilia neiṁasu naṗa nevisu naṗa apim apo si rui, a visae ve sanene, yoko nekekara vaṗisi, a yoko kiau kekarena nene kila kiamiu kekarena m̄ena ga ve keviu vaṗisi.

⁴ Nepisa sanene komin naṗa pogos na nesiri piṁasu pan amiu nanua ne, nemloge piowagan manene laa. Nemloge sane losineu lavis worovia, a wamarau la suṁa mlalau. Visena m̄arera la naṗa nepisa pan amiu e m̄aki nene, pe nekila re poli komin naṗa sineun amiu m̄ena ga aloge viowa, ana sineun nekila amiu avisu kilale sane sineu sii manene amiu silaga.

⁵ Ana sa naṗa ita make ga tekilia, tai sike likan amiu naṗa naga kila pupia naloge viowaena nene. Sineun nesape sane sur viowa naṗa naga kila, kila inu nemloge piowa, ana pe in re ga poli, kila amiu m̄ena ga moki liu amloge piowa. Ana pe sineun re si nevisave monar ala manene si nakoena van poli, ⁶ komin nekilia sane amiu punu ga apis pan ṗisi rui. ⁷ Apis pania toroki narui, ana nagane pe pogos naṗa aviewo naga, sinemiu ye si naga. Visae peraga, yoko naga loge

viowagan manene sina vano vano-o viowa vania.
⁸ Ore, nom̃areran vena neviun van amiu ve sa nini, sane monar akila merarava ruru vania sane sinemiu si ke naga na wa.

⁹ In na nesiri m̃aki taṓena nene nanua ne, sineun nevisuveve sane yoko amiu akekara naṓa alogear kiau visena lala naṓa sike loyuma ea, pona peraga. ¹⁰ Pogos naṓa nepisa nesape popon aviewo yar tai, nemlelaga nesape yoko akila, a naga naṓa aviewoia, in m̃ena ga neviewoia. A nemninue ga, pona naga kila ma sur laṓasia piowa pan inu yo, ana nekekanan naṓa nevisawal e marana Kristo nesape nepiewo naga, ana sanene, iila amiu m̃ena ga vena akekaran aviewo yar taṓena. ¹¹ Monar tevisuar ruruia, komin naṓa tekilia ruru sitomena viowa lala kiena yermare vena kila kare itaena, ana visae tesuma teviewo ita silaga, yoko naga taṓatete nena taulu ita ṓisa.

Pol pisayu kiena mrapa navaen ma Troas amio Masitonia

¹² Ana pogos naṓa nepam re si pun amiu ma Koren poli, nepito ga nemlologon lologena wo kiena Kristo garo kumali naṓa Troas, ana e yo nene, nepisu sane pulutava pietava ruru nena pan inu vena nekila yumaena kiena Suṓe. ¹³ Ana sur viowa tai e pogos nene, nesitom ke nesape yoko nelual wolai naṓa Taetas e yo nene, ana naga pe su re poli. Ana kiau sitomena nesitom manene naga paṓisi, kila sane pe piavi re poli

nemligan la nene, nemla si kiau mrapa yalen silau ma lepas nene Masitonia.

¹⁴ Kiau yalena pa sanene narui, ana potena pañisi pa Ntewa komin naña silaga mligan Kristo naga sumña sumon ita. Nanua sumo ita tepe kiena nasinekar ga lala, ana naga taulu ita rui, ana tetaveve naga tepa kar ga e yo make ga, ana pogos naña yar la apisu ita, yoko avisu kilale sane Kristo naga pe kieta Supe. Pona nekilia nevisa sanini, sane ita na sane ponotaninu wo tai naña asikapia, ponos miyere þar make yo, ana pogos naña yar la amloponia, yoko alopon kilalea sane Kristo sumña pimi m̄alivin la. ¹⁵ Ntewa kila ponotaninu nene pa vanua e yar make ga, pano tol la naña asumña apanon ke mrapa natamaliaena, a pano tol la naña apanon ke mrapa na kovioena. ¹⁶ Ana e la naña apanon ke akovio, ponotaninu nene naga ponos piowa sane sur mare tai naña kona, ana e la naña asumña aṃal ke malena, naga sane ponos nen m̄aþes wo na tamaliaena.

Nanene narui ita tevisu yuṃaena naña mesuṃa mekila naga pe pupia yuṃaena pañisi, komin memlologon visena kiena ne Ntewa naña kilia kila yar tol malena pona tol marena. ¹⁷ Nalologena la þasa pe asitom manene re urmi e yuṃaena nene poli, asumña amlologon ke visena kiena ne Ntewa vena ataulu ga kilavaru ea, ana imimi na pe sa re nene poli. Ntewa pisir plan imimi ana memiyuṃae ga e yo metava e marana, a mepian visena lelaga kiena Kristo pa yar taþena lala, þarpoyo ga e m̄areraena naña

mla pan imimi.

3

Imimi na yar na kilaen yuũaena na viranarena viu

¹ Nepisayu kiamimi yuũaena keviu na metava ne, pe pon re asitom avisave nepis vilave ke sane navianena taņena lala navisokanena. La nene apim pun amiu amio m̃aki la naņa apisayula asape la apo pa sanape, a pogos naņa amolue petan amiu, aņareran asape monar amiu asiri si m̃aki laņasia vena visawalen kiela yuũaena naņa aņar ke pano. Ana visae sinemimin meva si e lele taņena, pe mesitom re m̃aki tai ne sanene poli vena visawal imimiena. ² Visae yaru tai sinenan kilia visave imi sanape, popon imi visu ga mras nen kiamimi yuũaena e kiamiu malena lala. Amiu na sa ga m̃aki tai narui, naņa Kristo siria navisawalen kiamimi yuũaena. Yaru taņena lala akilia aim auloia, vena akilia ya naņa mesiria e losinemju lala. ³ Yoko avisu amiu sane ape m̃aki tai naņa Kristo naga mligania, ana moņar pimi, a yoko avisu kilalea sane lelaga, mekila yuũaena e amiu po paņisi. Ana m̃aki nene naga pe m̃aki re naņa wii na kilamemego na kapi naņa asiri e m̃as nen tus tai poli, ana naga m̃aki naņa Ninuna Ntewa siri e los nen yaru.

⁴ Visae ve sanene, kiau visena la nene pe visen vilave re poli, ana mekilia mevis sanene komin Kristo ga naga taaga kila naņa moņasine Ntewa keviu pa Ńisi. ⁵ Visae imimi ga, yoko taņatete mevisave imimi metorokin mekila sur tai, komin

sur make ga naña mekila, Ntewa ga kila sane imimi mekilia mekila. ⁶ Naga ke narui mla m̃areraena amio kiliaena pan imimi, kila imimi mepim mepe kiena yaru na yuñãena e lepas na viranarena viu naña naga kila amio ita yeririna lala na yomerava. Naviranarena p̃esa asiri plan kana visena ne lala e tus lala navisaluaena lala kiena Mosis, ana visena la nene amiila ita ana pe torok ruru re poli. Apowo, ana ya naña akila, akila meraravan ga asape ita yaru nakilaroen navisaluaena, naña yoko monar telual marena vanonia. Ana naviranarena viu, naga visena ne lala apim añalivi e Ninuna Wa, a Ninuna nene narui kila ita tetol natamaliaena.

⁷ Mrapa marua nasumo nene, naña ate kana navisaluaena lala e kilavaru la naña pe lepalepas nene, naga suñã pisaar ke ga kieta marena, ana naga pe sur tai naña pe wa pañisi. Pogos naña Mosis p̃ar lepalepas nen kilavaru la nene, naurarena kiena ne Ntewa pimi e naga, ana pogos naña p̃ar maran si kilavaru la nene pa le Israel lala, m̃areraena naurarena nene suñã pito ke tano rui, ana la apisu p̃ele marana komin naña pilavila na pilavila. ⁸ Sanene, visae naurarena kiena ne Ntewa miyuñãe m̃arera e pogos naña apisawal mrapa na tolen marena, yoko yuñãe ve sanape e pogos naña yoko avisawal mrapa na tolen malena? ⁹ Yoko naurarena kiena ne Ntewa monar yuñãe ve keviu va manene va p̃isi e pogos nene, a tesuñã tepisu p̃isi rui naña kapi vivaga na mrapa viu suñã tego kar ga, suñã taulu kapi na mrapa marua nene naña suñã pito ke tano rui. ¹⁰ Lelaga, kapi viaga na mrapa

marua nene naga suña tego ruru nanua sumo, ana nagane, tepisu naña kana kapi nena sane pe tego ruru re si poli, komin kapi na mrapa viu pimi ãarpoyo, suña tego keviu e yo make ga. ¹¹ Kapi naña suña pito ke tano nene, lelaga naña naga pitomi ãesa, pitomi amio kana pupia naurarena nena. Ana nagane kapi viu naña naga pimi mare ga sirau, yoko naga sulue na sike ne, a kana naurarena nena yoko ve keviu manene lue.

¹² Visae tesitomyuli nene, yoko kila kieta sitomena ñarera ruruia, a ve temaraun re si naña tekila kapi vivaga kiena Suñe tegoli yo kar lala. ¹³ Ana tesitomyuli ñena yermarua Mosis, naña naga pa metava e tavie, ana Ntewa pimi lavisinia, kila marana pilavila pañisi. Ana pe pon re ita teve sa naga poli, komin pogos naña ãasuñe si pitomi pu le Israel lala naga kalo marana e kulmrae vena ve avisu re, vano-o tol pogos naña kana tegoena suña vito ña tano vano ãisi. ¹⁴ E pogos nene, pe apisuli re kapi nene poli wa, komin naña ãarila ñarera pañisi, ana tepisu naña pimi tol nagane, la sa ña ke nene na wa. Apulo ke visena lala e tus marua naña sike ne, ana sane kulmrae na sike ga wa, suña kilawo ke kiela sitomena lala. Ana visae alelaga ga e Kristo yoko naga kilia tarlua kulmrae nene vena akilia avisu kilale kiena yomerarava viu. ¹⁵ Pogos naña apulo ke navisaluaena kiena Mosis, naga sa naña sur tai kalo ke ãarila, ¹⁶ ana pogos naña visae yaru tai imi e Kristo, a warlua sur nene naña kilawo ke kiena sitomena, ana naga kilia visu kilale suria. Sa ga visena na Nasiriena Wa

naña pisayu yermarua Mosis nene, naña pisape “Pogos naña Mosis pilon naga, kira pisu Suþe, kulmrae nene mloru si petania.” ¹⁷ Ana pogos naña visena nene sape Mosis pilon naga kira pisu Suþe, visena naña Suþe, kana kinasia naga naña pe Ninuna Wa kiena ne Ntewa. A tekilia tesape e nape naña Ninuna Wa kiena ne Ntewa sike ea, yaru lala akilia aurmatan m̃areraena na viowaena, alual malena.

¹⁸ Sanene, ita make ga naña temlelaga rui, pe kulmrae tai towo re si marata poli, ana tesuñã tepisu ruru nena pupia nauraraena kiena ne Ntewa. A pogos naña tesuñã tepisu m̃ã pano, nauraraena nene pimi puleule e ita, pano tol naña tepim tepe sane kupito vena tegoliaena kiena kapi vivaga va va yeririna taþena lala. Ana kapi vivaga nene pe molue re kome kieta malena poli, molue kome kieta Suþe, naña naga Ninuna nanene naña sike e ita.

4

Pol amio nalologena lala amlologon kapi vivaga nalologena wo

¹ Mesuñã mekila ke kapi vivaga kiena ne Ntewa pilavila ke sanene, naga pe kiamimi pupia yuñãena tai vena iilaena yaru taþena lala. Losinena Ntewa pulen sineyeena, a naga ke narui naña mla yuñãena nene pan imimi, a pogos naña mesitoñal nene, kila sane pe sinemimi maren re yuñãenen pogos tai poli. ² A pogos naña memiyuñãe, mesuñã memiyuñãe ruru po silaga. Yaru laþasa, amiyuñãe vinau e ga e

nakilakotaliaena lala pona akilali naþa awere sitomena kiena yaru lala, a akilia avilovilon mēna visena kiena ne Ntewa va ve taþena, a imimi na pe mekila re þelaga la sanene poli. Mekilia mesape pogos naþa mesuṃa memiyuṃae, mekila ke ga e marana Ntewa, a monar meyuṃae wo. Yeririna taþena mēna lala asuṃa aþaveve ke kiamimi yuṃaena a asuṃa amloge ke ponía, komin naþa asuṃa apisu kilale asape mesuṃa mepisawal make visena lelaga kiena ne Ntewa lala mesmes ga.

³ Memlologo sanene, pe yaru re tai naþa kilia visave naga pe mloge kilale re lologena wo poli, naþa mesuṃa mepisawalia. Ana visae yaru tai visave pe merarava re pan poli, naga pe yar re tai naþa suṃa mialin ke yomerarava poli, ana monar ve yar tai naþa suṃa mialin ke ga yemalolo, naþa monar sur tai kilawo ke kiena sitomena, sane kulmrae naþa tepisayu rui. ⁴ E lepas kiena ne la naþa pe amlelaga re poli wa, suþe viowa na yomerava nini naga kilawo kiela sitomena rui, naga kila la sane ape kilamara kata, komin naþa naga yepen mavin sape avisu pupia kapi vivaga na lologena wo kiena Kristo. Kristo nene, kiena naurarena tego paþisi, komin naþa naga þarnena marana Ntewa lelaga. ⁵ Mesuṃa memlologon ke nene narui, nane Yesu Kristo, kieta Suþe. Pe mesuṃa mepisiri plan imimi re sina pan amiu poli, ana mepe kiamiu yar na yuṃaena ga lala vena lologonen Kristo van amiu vena akilia naga.

⁶ A sur make ga la nene naga pe yuṃaena

kiena ne Ntewa ga. E nasiiena, Ntewa pisa sanini, sape “Yoko kapi imi tegoli yemalolo naña m̃eke ne,” a suña kila ke sanene pan ita na wa. Ntewa ke ga nanene narui naña suña miyuñae ke nagane, kila kiena kapi vivaga tegoli losineta lala, kila tetol kapi nene naña suña tego molue kome marana Kristo, naña molue nena e naurarena kiena ne Ntewa naña sike ea.

⁷ Nakiliaena lala na naurarena kiena ne Ntewa sike e ita sanene, naga pe sur wo tai naña pe wa pañisi. E imimi naña memiyuñae ke yuñae kiena kieta Suñe, mepisu sane imimi na sa ga sur korena ga, a pe metorokin re naña kiena nawaena la naña powo nene ase e imimi, ana Ntewa naga po, suña kokonia ke e kiamimi malena la silaga. A nanene kila sane visae pogos tai meyuñae sur wo la p̃asia, ana yoko mevisu kilale ga sane pupia m̃areraena na kilaen sur la nene pe pe m̃areraena na yomarava re tai nene poli naña p̃ar po yo kome imimi, ana naga m̃areraena tai nae ma e peni naña kom ga e Ntewa pitomi.

⁸ Nagane memiyuñae ke memio m̃areraena nene naga miila imimi keviu, komin naña mepane ke pog m̃arera la moki, ana pe memloru re poli wa. Sur la moki naña akila imimi mesitom p̃ele pañisi, ana kiamimi sitomena la pe kovio re poli. ⁹ Yaru la moki naña akila kare imimi pano pañisi, ana silaga Ntewa pisuar ruru imimi. Moñar magka lala, ana tañatete awe plan imimi, memal ke na wa. ¹⁰ Lelaga, pogos m̃arera pan imimi sanene narui, pano pano

naloge viowaena na marena sike e yepemimi sa naña Yesu ãaria e kiena marena. Ana metamaña ga, komin naña visae marena kiena Yesu sike e imimi, yoko kiena malena mña ga sike e imimi. ¹¹ Memiyumãe kiena Yesu sanene, kila sane pogos naña memal mesike e yomerava nini, ana silaga mesike ga lavisin marena, ana nanene kila mña ga sane amiu akilia avisu kilale sane malena kiena Yesu sumã mãmãlivi ke keviu e yepemimi na marena ga lala. ¹² Lelaga naña mesumã mepanon ke kiamimi marena, ana mekila sanene vena amiu akilia avano alual kiamiu malena.

¹³ Visena tai sike e Tus na Yauena Wa lala, naña yaru tai pisi pisape “In na nemlelaga rui, nane kila narui nekilia nevisawal visena,” a mepisu sane ninuna na viawaena naña sike e yaru nene, nagane keviu mña ga e imimi. Mesa ke ga naga, naña imimi mña ga memlelaga, a sur ya naña memlelaga e naga, nanene mepisu sane mekilia mevisawalia. ¹⁴ A pe memaraun re nena visawalen poli, komin naña mekilia ruru sane kieta Ntewa naña naga kila kieta Supe Yesu mali sina e marena, yoko naga kila imimi mña memali sa ke ga Yesu, a yoko naga kila amiu mña amal sina sane imimi, ana yoko were ita punu ga teva tesike temio naga. ¹⁵ Lelaga, mepa moãarpooyo e pogos mñarera la moki sanene, ana pogaga, komin naga kiamimi mrapa ke ga tai nanene narui naña mekilia miila amiunia. Sanene sinemimin ga lemamiena kiena ne Ntewa monar momolue silaga va yar kar ga lala e yo punu ga, vena kila sane ayeluar Ntewa silaga,

asumã avisa potena vania vano vano-o vena kila kiena naurarena imi lapa ve keviu.

¹⁶ Sitomena wo la nene kila sane pe sur korena ga naãa viowa van imimi ve sanape, ana mesumãlu momãrera ruru mesumã ga. E lepas na yepemimi lala, pimi pe yermarua, sumã pimi pororovia, ana e lepas na ninumimi lala, Ntewa sumã kila pimi pe urviu, mãrera ruru lue ga e legiena make ga. ¹⁷ Narin pog mãrera lala e yomarava nini, la ape na yam plas ga, ana asumã akila ita tesururuia vena teva tomãlivi tese e naurarena nae peni, naãa keviu paãisi, po pano-o po manene laa, naãa teloge ke wonia vano vano ve uro re. ¹⁸ Nagane ve kieta sitomena la ve su re e sur la naãa kilamarata visuia, ana kieta sitomena la sike e sur la naãa kilamarata pisu ãele ga, komin naãa sur la naãa kilamarata kilia visuia, la ape na yam plas ga e yomarava nini, ana sur la naãa kilamarata pisu ãele ga, la ape na sulueena ma e peni.

5

Leleta ma e peni

¹ Tekilia rui tesape tasneta na yomarava nini taãatete sulue. Naga sane narin silparpara tai naãa tesuvia, naãa yoko pogos tai monar mawowo make ga, pona yar taãena lala aimi aweplania. Ana tekilia mēna tesape pupia mēta yumã mãrera tai mēke ga wa, naãa pe amiyumãen re e yomarava nini poli, ana Ntewa ga kila ruru monmãte ita ke ma e peni ana siraunia tekilia teva tesu ea. ² Yomarava nini

naga sa ga lele na tagiena ga, a tekekanan ga naña tourmatania, sinetan teva tetapolou e mñata yuñña ma metava, ³ a pogos naña teva tesike ea, yoko ve teloge re si sane pe mñata uñña re poli, ana tevisu ga na wa sane kieta yo nena napo nane sumña ne.

⁴ Lelaga, tasneta naga sa ga silparpara tai naña tesuvania e yomarava nini, ana lelaga naña, pogos naña tesike e sanene tesuñña takar malueta silaga komin naloge viowaena lala na pog mñarera la naña tesuñña toñarwowo ke yo ea. Pona pe pon re aimin awe kare tasneta poli, ana sitomena tai monar sumña ga e ita sane visae akila, pogaga, komin naña popon sane toure matan silparpara nini, teva tese yuñña wo tai sumo wa. Monar tevisu kilale ruruia sane popon sa tas nen marena nene pñisi, ana yoko tas viu tai kilia imi kus lelana. ⁵ Nakonua rui, Ntewa sumña miyuñña ke e ita vena kila ruru ita teva e kiena yo sanene narui. Naga mligan Ninuna sike e ita vena kila ita tesitoññal silaga sane kiena visaarena na kilaen van ita sanene yoko imi ve lelaga.

⁶ Tesuñña tesitoññal ke nanene, kila sane silaga toññarera. Tekilia tesape nagane, tesuñña tekila ke mñata uñña e silparpara nene, naña tasneta, ana pe tesu re e mñata uñña wo temio Suñe ma metava poli wa. ⁷ Sanene, pogos naña tesike e yomarava nini wa, monar ve tekilali re naña tesuññalu e ya naña kilamarata ga kilia visuia, ana monar tesuññalu mñarera e naviawaena. ⁸ A e lepas na pun imimi, moññarera ruru ke ga wa vena suen e yomarava nini vena mesuñña mekila

kiena yumãena, ana mepisu sane po m̃ena ga visae mekilia meligan tasnemimi la na yomerava nini, meva mesu nena e m̃amimi uña memio Suṑe. ⁹ Sanene, visae tesike e yomarava nini, pona tesike ma metava, ana silaga monar tekilali ya naṑa yoko naga kekarania. ¹⁰ Monar tesitom sane pogos naṑa Kristo pa totano metava e kiena yo wa na liṑereena, yoko ita make ga veve taaga teva tesuñalu tese marana. Ana e pogos nene, yoko naga ga kila sane wo van ita, pona viowa van ita, taveve ga ya naṑa tesuñã tekila e pogos naṑa tesike e tasneta e yomarava nini.

Kristo kila ruru marata temio Ntewa

¹¹ Pogos naṑa mesitoñal naṑa yoko Kristo liṑere yaru lala, memarau, a mepisu sane popon meyuñae m̃arera vena metaulu yar lala vena ve akovio re. Ntewa pisu kilale ruru ṑelaga na kiamimi yumãena la nene, a nesitom sane amiu m̃ena apisu kilale sane memiyuñae sa ga naṑa naga kekarania. ¹² Nesuñã nepisa ke sur la nene, pe nekila re poli komin naṑa sineun vena amiu avisirlua imimi sina, ana popon vena akilia akekara e ya naṑa mesuñã mepisa. Visae atol ruru kiamimi visena lala, yoko kila sane visena la nene kilia se amiu, ana yoko akilia avisatam̃e la naṑa asitom ke asape apo rui. Ana la nene akila la ke apa metava komin ga ya ne akila ke e maran yaru lala, ana pe asitom re ya naṑa sike loyuñã e kiela malena poli.

¹³ Nekilia nesape pogos naṑa nepisa visena la nene, yoko la ṑas naṑa asike amio amiu

monar avisave nepe wowe, ana na nene na poga ga. Visae lelaga naña mepe wowe, mepe wowe komin naña mekila manene laa yuñæna kiena ne Ntewa, ana visae þarimimi la woga ga suña ga, þarimimi la po komin naña mesitoñal amiu, ana monar ayagogon imimi. ¹⁴ Sur taaga ga naña suña kawæ ruru ke kiamimi malena vena mekila ruru yuñæna wo la kiena Kristo, nane kiena sinesiena. Memlelaga mñæra mesape kiena marena naga taaga tamalia kieta malena ita make ga, visae peraga, yoko ita punu ga monar temare ga, yoko taþatete ita yaru tai kilia mali. ¹⁵ A naga mare wo ita punu ga sanene, naga sinenan sape ita la naña temlelaga ea pona temat ke e yomerava nini wa, ve teyuñæ kieta re ga, ana teyuñæ kiena, naña naga mare vena tamalia kieta malena, siraunia Ntewa pisirlua si naga.

¹⁶ Sanene, popon ve tevisuveve re si yaru lala taveve sitomena na yomarava nini. Nanua, pog naña Kristo sike e yomarava nini, yaru la apisuvevea taveve sitomena na yomerava nini, ana nagane pe tepisu re si naga sanene poli, a pe pon re tevisuveve yaru taþena lala taveve mñæna sitomena na yomerava nini poli. ¹⁷ Na nene na komin naña visae yaru a naña mlelaga e Kristo, naga pimi sane pe yaru viu ruru nena ga. Kiena malena marua na sumo kovio nena ga, ana nagane kiena malena viu pimi mñalivi rui. ¹⁸ Ntewa ga kila sane tekilia tevilopu kieta malena sanene, komin naña naga ke narui mligan Kristo pitomi e yomerava ve na kilaen kieta mrapa towasuþe si teimi puna, a sinenan

sape monar toure yar tañena lala la mñena ga awasuñe si aimi puna. ¹⁹ Visae ve sanene, Ntewa miyuñae ãarpoyo e Kristo vena wereen yar na yomerava lala awasuñe sina vena aim ave taaga sina amio, naña naga pe sitom re si sape la nakoena van la yanon kiela mlamulena viowa la poli. A amio mñena nene, naga sinenan sape ligán kiena visena lala e limata, vena tela va va yar tañena lala vena la mñena ga awasuñe si aim puna. ²⁰ Sur ne nanene narui kila sane mepim mepe yaru kiena ne Kristo vena waren visena kiena ne Ntewa vano. Sanene, pogos naña mepisawal visena pan amiu, sa ga naña Ntewa ga sumã pis, ana sinemimin pañisi mesape meviun manenea van amiu punu ga mesape awis, e kia kiena ne Kristo, monar awasuñe amiu aim puna Ntewa. ²¹ Naga ke narui sinena miye ita, ana mligan narina nene Kristo, naña naga pe kilali re mlamulena viowa poli, kila naga pimi sane yaru na waren kieta mlamulena viowa ita make ga. Ntewa kila sanene vania vena kila sane ita yar na kilaen mlamulena viowa, tekilia teim teve yaru mesmesu lala e marana ne Ntewa.

6

Malena ñarera kiena yaru na yuñena kiena ne Ntewa

¹ Mesuñã memiyuñae ke sane yar lala na yuñena lele taaga memio Ntewa, a mekilia sanape naña naga pe lemam pañisi pan ita make ga. Sanene, mesape meviun manene van amiu, sane kiena lemamiena wo naña pimi e amiu, pe pon re imi korena ga poli. Monar alavia, a monar

atañania kila kiena yuññaena e kiamiu malena.
² Visena tai teke e Tus Marua pisa sanene rui,
 naña Ntewa sape,
*“Mesmesun pogos naña po pan amiu, neyagogon
 kiamiu tagena,
 a mesmesun legiena natamaliaena, neim neiila
 amiu.”* *Ais 49:8*

Ana e kiamimi navisuená, mekilia mevisawal
 mevisave nagane narui pe kiamiu pog mesmes
 narui, nagane narui pe legiena na natamalia
 amiúena.

³ E lepas na kiamimi yuññaena, mesuñña
 moñikeyon naña mekila wo lue ga, vena ve
 mekilawo re mrapan yaru kar ga naña sinenan
 sape imi. Pe sinemimin re naña yar lañasa asape
 mekila sur tai piowa, pona mekila pal yuññaena
 koyo tai. ⁴ Mesuñña mekila ke sur make ga vena
 kilologia sane mekila ke yuññaena mesmesu sane
 yar wo lala na yuññaena kiena ne Ntewa, ana
 mesuñña metañan imimi vena mevane sur ve
 moki. Mesuñña makawean imimi vena meva
 mowarpoyon luas nen yuññaena lala, pe suri
 korena naña mepane sur viowa lala, pog ñarera
 lala, a sur nailanen viowa lala.

⁵ Asuññalu akawe imimi, a añe imimi, a
 akoven imimi e yuñña nakoena. Pogos moki,
 memiyuññae na memiyuññae, pe momomaliao
 ruru re poli, a kamimi kinanena pe po re poli.

⁶ Piowa manene laa pan imimi sanene, ana
 mesuñña ga memiyuññae mesmes ga, a mesuñña
 memiyuññae memio kiliaena, a sitomena viavi,
 a sinewoena. Yeririna la apisu naña kiamimi

malena pulen Ninuna Wa, a kiamimi p̄elaga pulen sinesiena nāpa lelaga, ⁷ nāpa mepisawal visena la nāpa pe apisokan re poli, nāpa memiyuñae e m̄areraena kiena ne Ntewa, a nāpa e limamimi lala, e lepas na p̄amarua a e lepas na p̄am̄eli, mopuarar sur na mara lala vena kilaen mesmesuena taulu naviowaena. ⁸ Yeririna la p̄asa apisir plan imimi, a lāpasa amligan imimi mesike laa tano, lāpasa apisa ruru imimi, lāpasa apisa kare imimi pāpisi, ana pe mesitom re poli, mekila ga. Pe mepisa kotalia re yar tai poli, ana asuñã apisu imimi sane pe mepe lelaga re nenaga. ⁹ Akilia ruru imimi p̄isi rui, ana asuñã akila ke sa nāpa pe sinelan re akilia imimi poli. Memal ruru mesuñã ga, ana asuñã sinelan asape visae memare ga rui.

Nane suñã pa sanene pan imimi narui, ana pe sur korena nāpa mōpar ke nakoena lala, la tāpatete akilalua kiamimi malena na wa. ¹⁰ Pe sur korena ga nāpa naloge viowaena la moki pāpisi, ana sinemimi la kekara silaga. Pe sur korena nāpa limamimi korena ga silaga, ana mesuñã mekila ke yar tāpena la āpar ke sur moki. Ana pe sur korena nāpa pe kiamimi sur re la poli, ana mepisu nāpa sur make ga pe kiamimi ga.

¹¹ Erau nae Koren lala, pe kiamimi sitomen viowa re tai e amiu poli, nāpa mekilawania pan amiu suñã ga. Mepisawal sur make ga pan amiu rui, a sinemimi sii amiu pāpisi. ¹² Pe mekila re suri tai nāpa pona kilawo kieta erau wo poli, ana visae kilawo e lele tai, nanene komin nāpa amiu ga apuarar sitomena viowa lāpasa e imimi

suña ga. ¹³ Ana visae ve sanene, monar nevis van amiu sa ga naruu la narui, nesape awis, ve akilawan re si kiamiu sitomena laþasia, ana monar akilali losinemiu vike van imimi.

Avisuar ruru e la naþa pe amlelaga re poli

¹⁴ Sineun nevisa van amiu nesape ve asuña akilali re naþa aimi ave taaga amio la naþa pe amlelaga re poli. Popon asitomãalia sane þelaga na mesmesu amio þelaga na mlamulena viowa, lalua taþatete aviran la aim lele taaga, a legiena pe erau þele ga amio yemalolo. ¹⁵ Kristo kiena sitomena ve taaga þele ga amio Yermare, a yaru naþa mlelaga pe kiena sur re tai poli teke amio yaru naþa pe mlelaga re poli. ¹⁶ Nono na visokanen lala asu þele loyuña e yuña wa mña Ntewa pogos tai, a visena nene kana kinasa komin yuña wa mña Ntewa, naga pe yuña re ga tai poli, ana ita li na lelagaena kiena ne Ntewa naþa mali. Naga nene taveve ga kiena visena laþasa, naþa pisa sanini, sape

“Inu yoko nesike e la, yoko neyaloro likan la.

Inu yoko neve kiela Ntewa, yoko aimi ave kiau lus nena lala.

Lev 26:12

¹⁷ *Ve sanene, sane kiela Suþe, nepisa pan kiau la nene nesape monar amolue vetan taþena lala, monar aviaþa vetan yar viowa lala.*

Monar aim ave wa nenaga, a monar ve atol re kororaki lala, sanene yoko nekilia noworworun la aim asike amio inu.

¹⁸ *Yoko inu, sane Ntewa na mava, nekilia nevisa van la nevisave*

‘Amiu aim vena neve Arimamiu, a vena amiu ave naruu nena lala.’ ”

7

¹ Erau lala, nanene navisaarena wo lala kiena ne Ntewa naŕa pisape yoko naga were ita sane kiena namratava lala. Naga kila sanene pan ita po paŕisi, ana popon monar tevtanon naga silaga, naŕa monar towe plan make kororaki e kieta malena lala. Mlamulena viowa laŕasa tekila e tasneta, a laŕasa tekila ga loyuŕa e losineta, ana monar toŕisin la make ga, monar tevim naŕa teve wa naŕa teve wa sa naŕa naga sinenania.

Pol kekaran paŕisi naŕa Ntewa miyuŕae e la

² Sineun nesape neviun si tan amiu nesape ve sinemiu kar imimi re, ana aligan ruru lelemimi tai e sinemiu lala, vena nekilia nevisa re si sur laŕasa van amiu sumo wa. Popon akila sanene, komin naŕa pe amiu re tai poli naŕa mekila piowa pania, pona mekila karea, pona mekila kotalia e sur laŕasa. ³ Ana pogos naŕa nepisa visena la nene, pona asitom ke asape nesitom ke piowa e amiu, pona nesape nevisa kare amiu, ana pe sa re nena nene poli ŕisa. Peraga, sa ga naŕa nepisa rui, nesape amiu na asike e losinemimi rui, a tesuŕa tepim tepe taaga pano pano tol naŕa sanena naŕa tesike ga e malena taaga, pona visae ita tai vane marena, yoko teloge sane ita make ga temare. ⁴ Lelaga nekilia nevisa sanini nevisave in na noŕasine amiu keviu na keviu, noŕarwar inun amiu pa ŕisi, a pogos naŕa nesitomaŕ kiamiu yuŕaena wo

lala, suũa miila ke kiau sitomena keviu pa ãisi. Lelaga naũa nepane sur viowa moki, ana asuũa akila pan inu naũa nalogewoena a kekarena suũa pule manene paãisi e losineu.

⁵ Nepisa sanini komin sanene narui nanua sumo ne, pogos naũa mepa momãalivi e lepas naũa Masitonia. E yo nene, moñar ke si veveyuena mñarera lala, kila sa naũa memarau towe mũaga, a tasnemimi pe pulmas re tai naũa va ruru e poli. ⁶ Ana kieta Ntewa naga pe Ntewa na kila luũeluuẽen sitomena kiena yaru lala naũa amloge piowa, ana naga sitoũaal imimi, kila kiamimi erau wo naũa Taetas pimi mãalivin imimi, a pogos naũa mepisu si naga memloge po paãisi. ⁷ A pogos naũa sun pa imimi, naga pisawal sur wo la naũa amiu akila, miilaar imimi keviu paãisi. Naga pisayu sanape naũa naga mũana ga, pogos naũa naga pimi mãalivi pun amiu, naga mũaal sur mok liu e amiu naũa miila naga, a pisawal sape akila mara wo e kiamiu visena la nanua ne, naũa nagane apilopu kiamiu sitomena, asuũaalu asike e kiau lepasa. Pisawal sape sinemiun manene laa paãisi naũa neiũasu neyaliali amiu, a suwala, pogos naũa nemloge nene nemloge po na nemloge po!

⁸ Pogos naũa nesiri mũaki taũana nene pimi pan amiu, nemligan pae pano ana pe piavi re poli nesitomiyu sina, nesape visae ve neligan re ga rui. Nanene komin naũa nekilia nesape kiau visena mñarera lala yoko monar kila amiu aloge viowagan towe mũaga. A poglis naũa memloge

navisawalena kiena Taetas, nepisu sane lelaga ga na wa, kiau m̃aki kila kare kiamiu sitomena p̃isa. Ana nanene na yam plas ga, siraunia avilopu amiu sina, ana kila sane nekekaran sina naṗa nemligan m̃aki nene piṃasu. ⁹ Sane pe nepisa re nesape nekekaran naṗa m̃aki nene kila amiu amloge piowa poli, ana nekekaran ga naṗa naloge viowaena nene kila apilon amiu. A kiamiu naloge viowaena nena, pe imimi re naṗa mekila pimi m̃alivin amiu poli, ana Ntewa narui naga kila pimi m̃alivi. ¹⁰ Sanene, naloge viowaena nene naga naloge viowaena wo tai naṗa pitomi ma e peni, naṗa kila yaru vilonia vena tol natamaliaena. Ana naloge viowaena taṗena, naga naloge viowaena na yomerava nini, naṗa naloge viowaena viowa tai naṗa yoko kila yaru loge viowagan m̃a vano vano va tol marena. ¹¹ Amiu m̃ena akilia avisu kilale sane naloge viowaena naṗa Ntewa taṃan pimi pan amiu, naga kila yuṃaena wo tai paṗisi. Kila sane asitom urmi manenea e kiamiu malena, am̃areran ke paṗisi vena kiamiu kia imi wo sina. Sumo na, sinemiu mimin naṗa apisayu napiowaena naṗa sike likan amiu, ana pogos naṗa nepis pan amiu vanonia, apisu kilale ga mrapa na wa, ana amarau. Amiu ga asuṃalu apisi ke sina ga pan amiu, a amla nakoena pan la naṗa akila piowa, vena ve naviowaena tai su re si pun amiu.

¹² Sineun nesape nevisa m̃aki nasumo, nemligania komin naṗa nepisape nevis va lalua nene naṗa akila piowa, a sineu miye m̃ena yermarua nene naṗa lalua akila kare manene laa naga.

Nemligan mēna ga komin naḡa sineun nesape monar avisu kilale sane lelaga, sinemiu si imimi, ana pogos naḡa mevis van amiu e kia kiena ne Ntewa, amiu akekaran naḡa avatanon ya naḡa mevisa. ¹³ Ana poglis naḡa Taetas pimi pisawal pan imimi sape amiu akila sanene rui, kilalua kiamimi sitomena pa metava paḡisi.

Mekekaran manene laa nene rui, ana pogos naḡa Taetas pisayu sina pan imimi, pisayu sa naḡa amiu akila manene po pania, mekekaran pa laa sane. Naga pisa ke naḡa sike amio amiu, amiila naga a apisirlua kiena sitomena, a akila si naga kekara pa ḡisi. ¹⁴ Nepisayu amiu pania nanua sumo rui, nesape nekekaran kiamiu ḡelaga wo la pa ḡisi, ana pogos naḡa piḡasu ḡalivin amiu, ana pisu ga na wa sane pe nepisokan re poli, nepisa ga lelaga. Sa ke ga nanua sumo, nepisa ke ga sur lelaga la pan amiu silaga, ana nagane, akila kiau visena naḡa pa Taetas e kiamiu lepasa pimi pe lelaga ruru mēna ga. ¹⁵ Naga taḡatete sinen ḡesan pogos naḡa piḡasu, amiu amarau paḡisi a sinemiu kurkur, ana poglis naḡa pis pan amiu, amlogearia, apatanon ruru nena kiena visena. Kiamiu ḡelaga wo na sanene, kila sane pogos naga ḡasupe sina, sitomāl amiu lue ga silaga. ¹⁶ A e kiau lepasa, nepisa ga nesape nekekara naḡa nekekara, a nagane nepisu sane nekilia nowasine ruru amiu e sur make ga e pogos make ga.

8

Popon ala nalaena

¹ Erau nae Koren lala, sinemimin mesape amiu aloge lologena na sur wo tai naŭa suŭa ŭarwowo ke yo e suŭare lala na pupia lepas naŭa Masitonia, naŭa Ntewa miyuŭaen ke e kiena lemamiena. ² E yo nene, apa aŭarpo yo e pog ŭarera lala naŭa sur moki liu kilali kare la, a pano tol naŭa pe kiela sur re si poli, ana la nene, pe aŭis re nena e kekarena ga e ya naŭa la apisua. Limala korena ga, ana memilan paŭisi sane pogos naŭa amloge asape nalelagaena taŭena la gar Yerusalem apane ŭena pog ŭarera, sinela miye la ana sane limala pimi pule ruruia amio sur la lala vena laeŭ vano sane kiela nalaena van li taŭena la nene. ³ Pe yar re tai poli naŭa pisape monar akila ve sanene, ana la ga asape akila, a nekilia ruru sane amla sur make ga naŭa akilia alavia, vano tol naŭa laŭasa amlavia taulu ya naŭa akilia alavia. ⁴ A pogos naŭa aŭar viraran punu pae rui, amligan e limamimi, aŭareran asape melual mrapa tai vena liganen nalaena nini vano, komin naŭa asape visae akilia alual si pulmas naiilaena na lelagaena wa taŭena la sanene, yoko ve sur wo manene laa tai van la, naŭa yoko akekarar vaŭisi. ⁵ La apo paŭisi, komin nanua sumo atarŭaŭ make kiela malena sane kiela nalaena tai pa Suŭe, a amligan la asike vatanon kiamimi visena, ana siraunia amla ya naŭa la kiela sane nalaena tai pimi pan li na lelagaena taŭena lala. Akila po taulu manene ya naŭa mesitom mesape yoko akila, ana lelaga, akila mesmesun ga e nasinenanena kiena ne Ntewa.

⁶ Ana pogos naña mepisu le Masitonia taņena lala akila sanene, mesitom mesape popon meligan si Taetas iņas pun amiu, vena iilar amiu vena akila mņena ve sa nene. Mekilia mesape pogos naña naga piņasu sumo, naga suņa pis pan amiu ana amiu asiar kilaen yuņaena wo na sinewo nene rui, ana popon naga imi kila make ruru nena ga amio amiu. ⁷ Mepisu naña yuņaena taņena lala, asuņa akila ke po rui, naña kiamiu viawaena keviu paņisi, apisawal ke visena lelaga po paņisi, akilia sur moki rui, asuņa yepemiu mņen ruru yuņaena, a asuņa sinemiu sii imimi li nalelagaena taņena lala keviu paņisi. Akila yuņaena la nene pano taulu ya naña mesitom mesape atorokin akila, ana popon akila mņena ve sa ke ga e lepas na yuņaena nakianen nalaena nene.

⁸ Nepisa sanene, ana visena nene naga pe sa re navisaluaena tai naña yoko monar atavevea. Sur nene sike ga e amiu, ana nesitom nesape popon sa nevisayu taņena laņasa ve sanene, nepisawal sur wo la naña akila ke rui. A pogos naña yoko aloge, yoko kila amiu avisuveve amiu towe li laa mņaga sane, sane kiamiu sinesiena keviu mņaga yo, maran taaga sa ke kiena la nene pona peraga? ⁹ A popon tesitomāl lemamiēna kiena kieta Suņe Yesu Křisto ve keviu silaga, naña sumo, naga sa naña kiena sur make ga, ana naga sitom ita e yomarava, naga pitomi sa naña pe kiena sur re tai poli, vena kila sane tekilia teim teve yar na sur moki.

¹⁰ Pogaga, nanene kiau sitomena tai nene e lepas nene. Nepisa ga nesape nepisu sane

sur nene sinemiun asape akila e kas nanua rui, a nane asiar asape akila ne, ana popon manene laa naþa asuñalun sina vena akila make ruruia. ¹¹ Kiamiu sitomena nakilaen sanene naga m̃arera ruruia nanua þa rui, a nagane popon am̃areran ruru nakilaena, a vena akila va am̃a pe naþa atorokin akila. ¹² Ntewa pe pisa re pisape monar tela nalaena taulu ya naþa teke e limata vena tekiania, ana naga sinenan ga sape tekekan iilaen yaru taþena, a tela nalaena torokin ya naþa tekilia telavia.

¹³ Ana poglis naþa nepiun tan amiu vena akekan iilaena sanene, pe nesitom re nesape nekila sane yoko yuñena urmi van amiu poli, ana imi melala ga van li taþena lala. ¹⁴ Nesuñã nesitom ke ga sane popon ita make ga teve maran taaga ga. E pogos nene, kiamiu sur mok liu, ana lala na peraga, pe kiela re poli, ana popon kiamiu sur komþasia vano ve kiela, vena kiela sur m̃a tai ve tokak ga. A pona yam laþasa visae kiamiu sur re e kas laþasa naþa pimi ke ne, kiela sur komþasa kilia imi kila sane kiamiu narin sur m̃a tai. Pogos naþa tesuñã teiila ita ke sanene na po, kila sane ita make ga tesuñã marana taaga, ¹⁵ a yoko ve sa visena na Tus Marua tai, naþa pisa sanini, sape

*“Yar naþa war kinanena ve moki vim,
yoko naga kan vano kan make nena ga, ana
siraunia visu sane pe kana re si tai poli,
a naga naþa pa þar kinanena vitokaki ga, naþa
pisu sane torok ga, yoko naga ve ve plasan
re sur tai.”*

Nau 16:18

Yoko Taetas wasuþe si va gar Koren

¹⁶ Nakonua rui pimi, nesuũa nesitom amiu paþisi, a nagane, nepisa potena paþisi pa Ntewa naþa naga kila pa Taetas sape sitomena m̃arera tai sike e naga rui, sane naga monar iũasu iila amiu. ¹⁷ Ana pogos naþa mepisayu mesape iũasu m̃alivin amiu, naga kekaran ga, komin naþa kiena sitomena tai sanene sike pa e naga rui. ¹⁸ A pe naga re ga taaga poli, ana yoko meligan imimi yar taþena tai iũasu amio naga, naþa naga kieta puruvi tai naþa suũare la na yo moki akilia ruru naga, komin naþa naga yar wo nalologonen Lologena Wo. ¹⁹ Suũare make ga la akekaran kiena yuũaena, ana amligan lua naga vena suũa yaloro amio imimi metelivi e kieta lepasa, pogos naþa mesuũa mekilapolo ke kilavaru na iilaen li nalelagaena lala gar Yerusalem. Mekila yuũaena nene komin naþa sinemimi sii la paþisi, a pogos naþa atol nalaena nene yoko ailan ruru vaþisi e þelaga naiila laena naþa tekila pan la, yoko avisirlua kia kiena Suþe va metava. ²⁰ A mekekaran paþisi naþa kieta puruvi taþena nene taveve imimi, komin naga kilia iila imimi vena visuar ruruen pupia kilavaru nene naþa asuũa akoan poloia. Sine-mimin mesape mevisuaria taveve ga kana mrapa wo ne lala, pe sinemimin re si meloge visena laþasa imi sirau poli. ²¹ Sinemimin mesape mekilala yuũaena nene sa naþa yoko mesmesu e navisuena kiena Suþe, a yoko mesmesu m̃ena e visuena kiena yar taþena lala.

²² Ana amio lalua Taetas nene, yoko meligan

puruvi tařena ińasu visu amiu. Naga mńena ga pe yaru tai nařa memligan sur moki sike e limana rui, a mekilali mńa naga sanene pano mepisu nařa naga yepen mńaen make sur la nene. Naga pe yaru wo tai na yuńaena, a pogos nařa nepisayu kiamiu řelaga wo la pania, naga řasine amiu pařisi sape visae imi yuńae re amio amiu vera wo vařisi. ²³ Sanene, e lepas puna kiau erau wo nene Taetas, monar avisu naga sane imimi ke lua narui nařa memiyuńae veraga vena iila amiuena, a e lepas na kieta puruvi tařena lua nene nařa yoko aimi amio naga, monar avisu la sane aim pun amiu e kia kiena suńare tařena lala na lepas nene, a aimi e kia kiena Kristo nařa kiela malena suńa kipian ke kiena řelaga wo lala. ²⁴ Ana sineun nesape nevisa van amiu sane pogos nařa la nene aim ańalivin amiu, kiamiu malena lala monar kipian mńena kiamiu řelaga wo lala. Nesuńa nemlologon amiu ke pan la rui, ana popon manene sane la avisu kilale ruru ga na wa e kilamarala sa nařa nepisa ga sur na lelaga, nesape kiamiu sinesiena keviu manene pařisi, a akilia ala navisawalena wo tai nařa visayu amiu va va suńare tařena lala.

9

Nalaena naiilaena va li na lelagaena tařena lala

¹ In na nesiri plan visena moki rui e lepas na laena na kilavaru nařa tořar viravirania vena iilaen li na lelagaena tařena lala nene kiena ne Ntewa, ana nesitom ke nesape asumńa asitońal

ke sur la nene na wa. ² In na nekilia ruru sane amiu akekaran naþa asikol e yumãena nawar viraviranan kilavaru nalaena nene, komin naþa e kas nanua þaro pano, asumã akila ruru ke naþa ataulu kana narin kilavaru rui. A poglis naþa nepa e lepas nene Masitonia nepisayu amiu pan la, nepisape amiu le Akaea lala asiar rui, a pogos naþa la amloge miyur la towe mñaga, kila sane miilaar kiela sitomena pa metava vena monar añareran laa sane vena kilaen kiela komþasia. ³ Nepisayu amiu ke pan yaru taþena lala rui, sane amiu na amiyumãe po sanene sanene, ana sa ve akila re na piowa ga! Naga ke nanene narui kila sineun neligan kieta puruvi telu nene aimãasu avisuveve ruru amiu lia, komin naþa nepisa pan la nesape monar awar viraviran kilavaru la nene rui, ana la akilia aimãasu alual sane sanene pona pere wa. ⁴ Visae pere wa, monar amiu akila vilaga, komin naþa lavis ke inu mñena neimãasu narui, a yoko neimãasu nemio le Masitonia laþasa, naþa nepisayu amiu pan la rui. Ana visae meimãasu melual naþa pe akila ruru re poli wa, yoko kieta kap mare, pupia mawaena van inu, a van amiu mñena ga, a yoko monar la avisave nepisa koskosin manene nayeluaren kiamiu kia pan la. ⁵ Nane kila narui nepisu sane monar nevisa van Taetas lala aimãasu sumon inu, ana ayumãe amio amiu vena war viraviranan kilavaru la naþa amiu apisaar asape awaria, awarpolo ruru sumã ga, ana yoko meimãasun mowaria mowar vano. Nepisa sanene, ana ve asitom re sane nesumã nomãareran amiun ke nesape monar awar nalaena nene. Waren

nalaena na sanene, naga sur tai naña ape sinewo, ana kiamiu sitomena ga kekaran nakilaena.

Navisa ruruena na ðelaga nalaen suria

⁶ Ana visena tai ne nekilia nevisa manene van amiu sanini, yaru naña mapila ve tokaki, yoko naga war ve tokaki, ana yaru naña mapila ve moki, yoko naga war ve moki. ⁷ E lepas na kianen nalaena van yar taña, ita make ga veve taaga monar tela ga ya naña kieta sitomena pisaar sape tekila, ana pe pon re olavia naña pe okekaran re laen poli, pona olavia komin naña yaru taña mñareran sape monar olavia. Ntewa pe sinenan re nene poli, ana naga kekaran manene yaru naña mla suria molue kome kiena sinewo a e ga e kiena sitomena naga taaga. ⁸ Ana visae ko tai naña osuña omla ke nalaena pano, ve ositom manene re, komin naña Ntewa kilia lamaran si nalaena wo la imi van ko, ve moki na ve moki. Naga kilia kila naña silaga owar toroki e sur make ga naña sinoñania, a metavania owar torokin naña owar sina ve na iilaen yuñana wo taña lala. ⁹ Nanene sane visena tai na Tus na Yauena Wa lala naña pisayu sinewo kiena ne Ntewa, sape

“Naga suña kiakian lua ke nalaena wo lala pa yar la naña limala korena, kiena ðelaga wo lala sulue na sike ne.” *Yauena 112:9*

¹⁰ A Ntewa, naga ke narui mla mrasa pan ita vena temapila e porotano, a naga ke narui naña kila kurusa ðar mrasa nakilaena kata kinanena ea, a ve sanene, yoko naga la ya naña sinetania

vena kilaen yuũaena ea, a yoko kila kieta sur la imi ve moki, a yoko kila naņa kieta yuũaena mesmesu lala awar mrasnela ve moki. ¹¹ Yoko naga visu kilale kiamiu p̄elaga wo nene, naņa silaga akekaran kianen suria, ana yoko naga lamaran sina ve moki vim van amiu, a pogos naņa mowar kiamiu nalaena va taņena la nene, yoko kila naņa ita punu ga tevisa pupia potena tai va Ntewa komin navisa ruruena nowo naņa naga suũa kian ke pan ita. ¹² Nalaena nene naņa yoko ala vano, yoko iila li nalelagaena wa taņena la ve keviu naņa asuũa apane ke pogos m̄arera, a yoko kila ayeluar m̄ena Ntewa ve keviu vaņisi, avisa manene potena vania vaņisi.

¹³ Yoko ayeluar Ntewa sanene komin naņa yoko avisu naņa pe asuũa amlologon re ga lologena wo kiena Kristo poli, ana asuũa amlogear m̄ena ya naņa pisa, a yoko avisu nalaena naņa amlavia keviu paņisi, naņa yoko kilia iilala ve keviu a iila li taņena m̄ena lala. Ana pogos naņa apisu sur la nene, yoko avisu kilale m̄ena sane kiamiu yuũaena suũa kipian ke sane kiamiu viawaena m̄arera ruruia a pe lelaga na sike ne. ¹⁴ Yoko avisu naņa lemamiena kiena ne Ntewa pule manene sanene e losinemiu, a yoko asitom amiu vano vano p̄isa, yoko sinela ye amiu, yoko asuũa alen wo amiu silaga.

¹⁵ Popon avisa potena van amiu komin kiamiu nalaena wo na sanene, ana po m̄ena ga vena ita punu ga tevisa manene potena van Ntewa silaga komin nalaena tanea naņa naga mla pan ita, naņa narina ne nane Yesu Kristo.

10

Pol mla navisatañeena pa la naña apisa kare kiena yuñeena

¹ Erau lala, akilia sane in ga Pol nesuñña nesiri piñasu, ana sineun nesape ala kiau visena e ñelaga ñña nena naña sike e Kristo, naña naga moñau po a malumu po. Naga ke nene narui ñelaga naña nesuñña noñikeyon kilaena pan amiu nanua sumo, ana nekilia ñña sane yaru lañasa asuñña apisa kare in ke vanonia. Asuñña apisa ke asape pogos naña nesike nemio amiu, in na nemalumu manene laa, a nemaraun visena, ana asape pogos naña nesiri piñasu, nekila ga sane in na yaru tai naña nekilia nevis ññarera, komin ga naña nesike perinan amiu. ² Na nene na pogaga, ana monar akilia sane pogos naña neim noñalivin amiu, visae nevisu sane popon nevis ññarera, nekilia nekila ga narui. Ana sur ne nanene narui nesape nevisa van amiu, a nepisa awis pan amiu, neviun manene van amiu vena akilali napiowaena la nene vim wo towe laa ga wa, pogos naña pe nepim noñalivi re pun amiu poli wa. Visae ve sanene, pogos naña neimñasu, yoko ve sur re si tai naña monar nevis ññarera ea, ana visae peraga, in na pe nemaraun re nena nakuanen visena lañasa naña ññarera na ññarera van la naña asike loyumu e napiowaena la nene poli, a naña apisa kare imimi ke ne, apisape memiyuñae taveve ke ga sitomena na yomarava.

³ Lelaga, ita make ga tesike e yomarava nini, ana imimi pe metaveve re kiena ñelaga

poli. A lelaga, mesuũa mekila ke mara tai e yomarava, ana mara nena na pe nae re e yo nini poli. ⁴ Mesuũa mesikol ke mara tai naũa m̄areraena lala nae ma e peni asuũa akila ke pan m̄areraena lala na yo naloge viowaena, a suri na mara la naũa mesuũa moũaria, pe ape na yomarava re nini poli, ana mekila ke mara moũar ke m̄areraena kiena Ninuna Wa naũa kilia yumu plan make yo m̄arera la naũa sur viowa la asuũa atapolou ke ea. ⁵ Visae avisa visena viowa laũa na kaween yuũaena kiena Suũa, ana mekilia metaulu woga. A visae avilaven, akilali naũa avisalũar kiena yuũaena, ana mekilia meva mowarpoyo vena kilaen yar la akilia naga e kiela malena. Visae asuũalu amio sitomena viowa lala, ana mekilia mevilon yar la nene aimi naũa kiela sitomena imi m̄arera vena ataveve ga Kristo. ⁶ Yoko mekilia mekila ve sanene van amiu vano vano ataũan amiu, vena aligan amiu asu vatanon visena kiena Suũa, a siraunia, yoko mekila m̄a vano va e yo taũana la naũa yaru na kaween naga asike m̄ena ea.

⁷ Ana e lepas na yaru nene naũa pe purũaes nen napiowaena nene, pona amiu asuũa apisa ke asape sur punu ga pogaga komin naũa yaru nene pisape naga pe yeririna tai kiena Yesu yo? Ana awis, ve avisu re ga kulyepena, aũaionli avisuveve sur lelaga naũa sike pae e maramiu rui. Naga pisape pe yeririna kiena Yesu na pogaga, ana naga suũa kila ke piowa, a popon naga visu ruru si kiena malena. Sinemiun ke yagogonen naga na wa, ana sanape, inu m̄ena ga nepe yeririna kiena Yesu, ana komin ya ne yepemiu mavin

yagogon inuena? ⁸ Nepisa sanene, pona yoko laṗasa awisa kare in sina awisawe in na sineun ga netaulu luen suria, ana pe sa re nene poli. Pona lelaga sane pogos laṗasa noṗarwar inu paṗisi yo, pona nesuṃa nepisayu manene sane imimi ke narui mesuṃa mepisuar amiu, ana pe nesitom re nesape nekila sur tai piowa naṗa monar nemawania. Nesuṃa nepisayu amiu sanene komin naṗa Suṗe ga mligan amiu e limamimi nanua rui vena mekila kiamiu malena amio naga va metava. Visae amiu asitom awisawe mesuṃa mepis ke pan amiu vena kila kareen si kiamiu malena, pe sa re nene poli. ⁹ A visae asitom ke asape in na nepe yar na sinemimiena tai naṗa nesuṃa nesiri ke ṃaki la nene piṃasu vena kila sane monar amaraun inu, naga ṃena nene pe mesmesu re poli. ¹⁰ Nekilia nesape laṗasa asuṃa awisayu in ke sanene rui, asape “Suwala, Pol sur nene, naga ga kiena ṃaki lala apulen visena urmi la naṗa ṃarera, ana visae ovisu naga, naga sane pe yar malmale kar ga tai, a visae ologe naga visi, melala ga.” ¹¹ Ana sineun nesape nevisa van la nene sane popon awisu kilale sane ya naṗa mesiriwal ke e ṃaki, pogos naṗa pe mesu re memio amiu poli, naga maran taaga ga sa ke e ya naṗa yoko mesuṃa mekila e maramiu, pogos naṗa mesike memio amiu. ¹² Nepisa sanene, ana pe sineun re visaen sur ve moki poli vena kilaen si kiamimi kia va metava. Pe sineun re naṗa meim sane yaru taṗena laṗas poli, naṗa awilaven manene visawalen si kiela sur wo lala. Yar la ne sanene asuṃa awisuveve

ke kiela erau lala, a asumã apisuveve ke m̃ena yar tañena lala, ana asitom asape la apo taulu la, ana naga nene pe yuãaena na wowe ga tai, komin naña pona la punu ga nene apiowa maran taaga yo.

¹³ Sanene, yoko ve nevisayu manene imimi re va sanene, ana monar nevisa sur lañasa van amiu naña atorokin yuãaena lala naña Ntewa mligan e limamimi, a loyuãa ea, pano tol sur lañasa e lepas navisuar amiuena naña mesuãa mekila. ¹⁴ Pe mesitom re naña meva manene poli vena mekilali naña mesu metavan amiu, ana mesmesun naña mekilia mela visena lañasa naña monar avatanonia, komin naña ve sinemiu ãesan re sane imimi ke narui naña moñar ãesan lologena wo kiena Kristo pimi pimi yalen silau pimi tol amiu. ¹⁵ Visae tañena lañasa la apimães pun amiu, yoko ve mesitom re navisuar amiuena, pona nalaena visena la ne sanene van amiu. Ana siraun naña mesiar yuãaena memio amiu, monar meva re laa na wa memio amiu. Sinemimin ga naña kiamiu naviawaena suãa kapuru silaga, a mekekaran manenea visae kiamimi yuãaena kilia imi ve keviu laa sane, ve e re ga e kiamiu yo, ¹⁶ ana yoko mekekaran vañisi visae amiu akilia aiila imimi vena kilaen sane teva re laa ga wa vena lologonen lologena wo va e purvanua tañena lala na pun amiu lepas ãasa na vano, vena teva tetepo yomãrua e yo naña yar tañena lala pe apa amlologo re e poli wa. Sanene, visae pogos tai tevisayu yuãaena lala naña yoko tekila e yo la nene, yoko tañatete si avisa kare ita avisave tesuãa tepilaven ke ga mrasa naña

molue e lokove kana yar tařena! E pogos nene, yoko la akilia sane tesuřa tepisayu mrasa nařa molue ga e kata lokove nařa ita ga temapila.

¹⁷ Sitomena la nene apowo pařisi, ana popon ve towarwar itan re sur nařa tekila, komin Tus Wa pis rui, sape

“Yaru nařa sinenan vilaveena sur tai, monar vilave ga e ya nařa Ntewa kila.” Ser 9:24

¹⁸ A pe pon re ita ga teyeluar ita si poli, komin yar wo nařa lelaga, pe naga re nařa naga ga pisa si sape naga po, ana naga nařa Ntewa ga pisa sape naga po.

11

Le Koren lala ataveve nalogena lala navisokanena

¹ Pona apulo visena la řasa nařa nesiri rui, asitom asape nepis wowe yo, ana awis, sineun nesape akila kiamiu sitomena ve piavi li laa sane e inu, ana yoko nekilali nařa nevisa si lařasa. ² Ana monar nevisa visena la nene komin nařa silaga nesuřa nesitom amiu pařisi. Yoko nevisa ve sanini, sane nepisu amiu sane amiu na kiau sira řee tanea tai, nařa nepisarar vena talopa amio kiena yar mesmesu nene nařa Kristo. Nemloge sane nepieluen ruru amiu nenaga, komin nařa sineun visuar ruru amiuena vena ave lelaga e visaarena nene, a naga nene sa ga Ntewa, nařa naga řena ga pieluen ruru ita, pe sinenan re sape teligan naga poli vena teva si varau. ³ A inu řena ga nemarau towe řaga sane sařisi yar tařena imi were si kiamiu sitomena va ve tařena. Sa nanua sumo ne, lomřara nene pimi

pisa kotalia sira naña Iv, kila kotalia kila mloru e mlamulena piowa, ana pe sineun re nenaga vena pogos tai ve alelaga re si e Kristo, sa p̄isi ve sinemi sii ruru re si naga taaga.

⁴ Nepisa sanene komin naña nepisu kilale towe m̄ña p̄arimiu rui. Pogos naña nalologena tai im̄asu visayu Yesu tañena tai naña pe Yesu re naña memlologon ke poli, ana alelaga ke e naga veraga. A pogos naña ninuna tañena imi m̄alivin amiu naña ve Ninuna re nene naña Ntewa mligania, apulan amiyopua ga. Pona pogos naña lologena wo tañena tai imi m̄alivin amiu, yoko akekaran logearen naga veraga. ⁵ Nalologena tañena la apisa kotalia amiu ruru nenaga e sur la nene, ana nepisu naña amiu asuñña asitom urmi manene laa e la. Amiu akila sa naña la ga ape nalologena e kieta yomarava nini, a amligan inu nesike tano, ana pe nesitom re nesape nanene naga mesmesu poli. ⁶ Lelaga, nekilia nesape yar laṗasa asitom ke asape in na pe nemlologo ruru re po poli, ana nekilia nesape pe yar re si tai naña kilia sur taulu inu poli, a nesitom nesape amiu apisu kilale suri nene rui, komin naña suñña m̄alivi ke e yuññaena punu ga naña nekila ke ne e maramiu.

⁷ Nekilia nesape e lepas na warpoloen kilavaru nene, yar laṗas pe akekaran re nenaga, ana nemninue ga komin ya ne sanene. Pona asitom asape nepiun ke kilavaru nene ve kiau ga? Peraga rui, komin pogos naña nepimin nemlologon Lologena Wo kiena ne Ntewa pan amiu, pe nepisali re nesape ala sur tai van inu poli. In na nemligan inu nesike laa tano, vena

nekilia nevisirlua amiu ava metava, ana pona amiu ðasia sinemiu karinun naþa nekila sanene? Pona asitom asape in na nekila piowa ga naþa pe nepiun re suri tai pan amiu e pogos nene poli yo? ⁸ Nekilia nevisa mesmesun van amiu nevisave e poglis nene, sumare taþena lala asumã amligan nalaena pimi vena iila inu, a nesumã nakan ke ga kilavaru nene pogos naþa nemiyumãe kiamiu ke ne. Ana pe nekila re sur wo tai pan la nene poli e pogos nene, ana nemloge sane sa ga nesumã nepinaun la ke ga. ⁹ A pogos naþa nesike nemio amiu, lumãu plasa pano pano þisa, ana puruvi la lua naþa akom Masitonia apitomi apisu kilale naþa nemloge ke piowa sanene ana apisuar ruru inu. Pe nepim netag li re pan amiu poli vanon sur tai, a nepisaaria sane yoko taþatete nekila kare amiu naþa nomãreran amiu nesape monar akila sanene pona sanene pan inu.

¹⁰ Nepisalar sanene komin naþa yepmavin yar la asumã avisa kare inu asape visokar inun kiamiu kilavaru, ana yoko nevisawal kiau navisaarena nene va kar ga e yo punu ga e lepas nene Akaea. Pe nemarau re nenaga, nepisaaria e kia kiena ne Kristo naþa kiena visena lelaga sike e inu sane yoko nekila ga narui. ¹¹ Ana pogos naþa nepisa sanene, pona yar laþasa yoko avisave sineun ga kila kareen kiamiu kia, pona asitom asape pe sineu sii amiu re poli yo, ana in na pe sa re nena nene þisa. Ntewa kilia ruru sane sineu sii amiu paþisi. ¹² Ana monar nomãreran ga sane visaarena naþa nepisa, yoko monar

nekila ga narui, komin naŕa sineun kemaren kapi kiena taŕena la nene naŕa asumã apilave kar ke sanene. Asumã apisali ke pan amiu asape asuã amiyuãae lele taaga amio imimi, asape akila ga yuãaena ña nena naŕa mesuã mekila ke ne, ana pe sa re nene poli.

¹³ Yar la ne sanene ape nalologena navisokanena ga, amiyuãae pe memes re nena poli, ana asuã akila kotalia amiu ke ga li na lelagaena lala, sane aŕar marana nalologena lelaga lala kiena Kristo. ¹⁴ Ana monar ve ailan re naŕa akila sanene, komin kiela yerkawa naŕa Yermare, naga ñena ga suã kila ke sanene rui. Naga kilia kila sane naga imi ve navisi wo na yomerarava, ¹⁵ ana tepisu naŕa kiena yar lala na yuãaena akila kotalia ke ñena yaru lala, akila la sane la ape yar na kilaen ŕelaga memesu. Ana pogaga, tekilia sane yoko ava ga narui aŕisi e yo naŕa memesun ga kiela yuãaena viowa lala.

¹⁶ Ana sa naŕa nepisa rui, pe sineun re sane nevisi ana kila laŕasa asape nepe wowe, ana visae sinelan visaena, ataãan avisa. Ana visae ve sanene, popon la akila van inu sa naŕa akila pa wowe lala, sane ve avisaluŕar in re sumo wa, ana ataãan nevisa ya naŕa sineun nesape nevisa. ¹⁷ Pogos naŕa nesuã nepisayu ke ki-amimi yuãaena, visae nevis vilaveena manenea, kila sane pe lelaga kemua naŕa nesuã nepis wowe, a yoko Suŕe taŕatete kekarania. ¹⁸ Pe pon re tevis vilave manene poli, ana in na pe nesa re yaru taŕena la naŕa asumã apis vilaveena kiela sur lala na yomarava nini, komin naŕa

visae nevis vilave, nesuũa nepisayu ke ga sur wo lala. ¹⁹ A nepisu naũa asuũa sinemiu miye ke yar taũaena lala naũa amiu asitom ke sane la ape wowe, komin naũa apisu sane la ape taũaena, pe atol re manmaruaena wo nene poli naũa amiu asitom ke asape asike ea. Ana visae asitom ke asape in mũena nepe wowe, komin ya ne taũatete akila kiamiu sitomena ve piavi laa sane e inu mũena?

²⁰ Nepisu naũa asuũa ataũaan ke pa nalologena navisokanena taũaena la nene vena akila sur viowa la ve moki van amiu. Akila van amiu sa naũa amiu ape kiela yar na yuũaena lala, la amiyelelain amiu, aũaar kiamiu sur lala, amligan la asu metavan amiu, a visae sinelania akilia alipa maramiu. Amiu asuũa ataũaan akila sanene, ana sanape? Ana pogos naũa nepisa ga visena tai pan amiu, komin ya ne yepemiu mavin yagogonena? ²¹ Pona popon manene visae in mũena nesuũa nekila ũaelaga kar la ne sanene van amiu, ana pona kila amiu akekaran inu ga yo na wa? Ana pe sineyeena, in na nemalum laa paũaisi yo, in na pe netorokin re nekila nene poli yo?

Pogaga, nepisa visena nene, nekilia sane yoko yar laũaasa avisave nesuũa nepis wowe ke sina ga, ana sineun nesape visae nalologena taũaena la nene asitom sane akilia avis vilave komin naũa asitom asape sur laũaasa na lepas pula naga po, ana in mũena nekilia nevis vilaveena sur laũaasa na sanene. ²² Visae asuũa avisir plan la ke asape la ape yer Epru, ana in mũena nepe yer Epru. Visae asuũaalun avisave la ape yaru na lepas nene Israel, ana in mũena nae yo nene.

Visae aligan la metava komin naña apisape la ape lus kiena Epraam nena ga, ana in mēna nepe lus nene. ²³ Ana yoko neviun naviunena tai van amiu narui, sane la nene amiyum̃ae kiena Kristo pa tol yum̃aena naña inu nemiyum̃aenia? Peraga, inu nesitom sane in na nekila po manene laa taulu la. Piowa ga naña nesum̃a nepisayu inu ke sina sanene, ana p̃arimiu la m̃arera pañisi kila sane in mēna lavis p̃aruu ve wowe, nane nesum̃alu nepis sanene. Ana sur nene na lelaga pañisi, naña in na nekila pupia yum̃aena la taulu la, yerkawa la akoven inu e yum̃a naloge viowaena yam moki taulu la, aṃe inu yam via nopulo p̃ele sina, a yam moki mēna ga naña pano-o lavis ga nemare. ²⁴ Nekilia sane yam lima rui, yerkawa kiena ne le Yu lala aṃe inu naña yam taaga, kovilva kakapuru e mosineu yam lualima yam telu pa ovari [39], ana akila sanene yam lima. Apisalup̃aria asape ve akila re va tol lualima yam ve vari [40], komin visae peraga, vena marena ga narui. ²⁵ Ana yam telu aṃe inu e laki lala, a yam si tai akove inu e kilavaru pano pano lavis nemare. Yam telu nokulu e sive naña waa talilu, e pogos la tai nene, sive mian inu m̃aga tol lemalo wetelu tai a legiena wetelu si tai. ²⁶ Pupia yalena piayavi lala, nemialoro e la yam moki manene laa, a e pogos la nene nepane sur la moki liu naña namarena ga. Wii lala na p̃alu lavis ayanlua inu nevano, yar la naña aṃevinaun ke yar lala aṃene inu, kiau yeririna ga lala sa

11:23 Yum̃aena 16:23 **11:25** Yum̃aena 16:22, Yum̃aena 14:19

11:26 Yum̃aena 9:23, Yum̃aena 14:5

naña le Yu lala apisu piowa e inu, a la naña pe ape le Yu re poli akila kare inu mēna ga. Nepa e yo nape, sane pulkumali, pona yomārua, pona losi, ana nepane pog mārera, ana silaga, puruvi navisokanena la nene, asumā akawe inu. ²⁷ Sila ga nepa nemio yumāena mārera a pog mārera, nepano naña nomomaliō p̄ele ga, nepano naña moto kar inu pañisi a viso kar inu naña pe kinanena re nena poli, a nepano naña pe nomāl re yo natapolounen miava poli. ²⁸ A metavan pog mārera la nene, silaga nesumā nesitomāl luen ga kiau yumāena nemio sumāre lala, naña sane sur tai naña urmi na urmi e kiau malena. ²⁹ A nesitom amiu mēna ga pañisi, naña visae nevisu amiu li na lelagaena yaru tai imi malumu, yoko kila neloge sane yepeu malumunia, a visae neloge naña amiu tai loru e mlamulena viowa, yoko kila naña neloge sineu laea pañisi.

³⁰ Nanene sur viowa la naña nesumā nepisuaia, ana nepisu sane nemalumun manene laa yumāena kiena Supe, ana pe nekila re sur wo tai naña nekilia nevis vilaveena poli, kila sane nesumā nepis vilave e pog viowa la nene naña nepanea. ³¹ A kieta Ntewa, naña naga pe Arimana Supe Yesu, naña yoko teyeluar luen ga kiena kia, naga kilia sape pe nepisokan re poli, sur la naña nepisa ke ne ape lelaga make ga.

³² A pupia sur viowa si tai naña nomālia, pe nepisa re ma metava poli, nanene e poglis naña nepa e pupia pulkumali naña Tamāskas. E poglis nene, p̄arin supe nae lepas nene naga yar naña

Aretas, a kiena yerkawa naña naga pisirlua vena visuaren kiena pulkumali sinenan sape tarar inu, ana pitetalia kiena lokul na taren yaru lala apa asuwo make mralaea punu ga e yo nene vena ve noure re. ³³ Lavis atol inu, ana erau lañasa amiila inu, akonwan inu e los nen pupia karo tai, ana apiar e kilika, asumãalu metava e pupia arman kove na yo nene, amligan malumun pito tano vanua e yepas nen kove nene, pito malum mña pito tol tano, ana nomolue e karo nene nopure nepano.

12

Sur la naña Pol pisu e mñeniena

¹ Poga, nepisu sane visae nesuñã nepisayu in ke sanene wa, yoko tañatete vilon kiamiu sitomena imi wo sina, ana pogaga, nemloge sane sineun nesikol si visena nevisayu sur la naña nepisua pona sur la naña Suñe kilologia pan inu e mñeniena lala. ² Ana yoko nesunyu yar kiena Kristo tai sumo wa, naña nekilia ruru naga, naña kas lualima taaga pa vari [14] ãaro rui, naga suñã ga milan añere naga pa kate ma e peni ma metava. Nemninue ga pa amio tasnena wetelu, pona apitom añerelua ga ninuna pavini, Ntewa ga kilia. ³ Ana pe sur korena ga naña visae pa e tasnena pona pa e ninuna ga, nekilia nesape lelaga sane yar nene pavini yalen silau pisu loyurña e mñata urña tanea e yo nene. ⁴ Naga mloge sur mok liu naña pe navisawalen re si poli, naña pe visena re si na yomarava lañas poli naña torokin navisayuena.

⁵ Ana pogos naña nepisayu yar nene, pona amilan yo, apisape ke, yar nene, naga pe yar tanea tai naña ne. Ana sanape, visae nevisave pe yar tañena re poli, ana nepisayu in ke ga, pona yoko avisa ga avisave nanene naga pe pe sur re tai poli a? Sanene, nepisu sane visae sineun nevisayu pupia sur lañasa sanene van amiu, popon nevisa ga e kia kiena yar tañena, vena akekaran naña alelaga ea, ana e kiau kia, yoko nevisayu ga kiau narin sur lañasia. ⁶ A visae sineun nevis vilave e pupia sur la naña nekila, yoko tañatete si yar tai kilia visave nesumña nepis wowe, komin sur la punu ga ape lelaga make ga. Ana pe sineun manene re nevisa sur la ne sanene poli, komin naña pe pon re nekilali aligan inu metava vanon sur lañasa naña pe apisuli re poli wa pona pe amlogeli re poli wa, ana in ga nesumña nepisa. Sineun nesape asumña avisuveve inu e yumñaena ya naña apisu nekila ke pan amiu, a e visena ya naña nepisa pan amiu.

⁷ A nepisu sane Ntewa mñena naga yepen mavin sape kiau sitomena va manene laa metava vanon mñeniena lala pona sur la naña naga pisa lologia ke pan inu, a naga mligan napiowaena tai sike e tasneu naña nemloge sane kurumol tai naña Yermare sumña miyur inu ke e silaga, naña sumña kila tasneu mlalaea, a sumña kila kiau sitomena sumña ga tano. ⁸ Nepiun tan Suñe vena lalua sur nene vetan tasneu, ana pe kila re poli, ana yam lua sina nemleninia, yoko kana yam telu nena, ana peraga rui. ⁹ Ana naga pis ga pan inu, pisa sanini sape “Yoko kiau lemamiena ga torokin

uarar ko, komin kiau m̄areraena kilia yuñae ve keviu manenea e pogos naña yuñae amio kiom̄a malumuena.” Visena ne nanene narui kila sane nekekaran nevisayu manene in laa sane, ana yoko nevisayu ga kiau malumuena lala, vena kila sane m̄areraena kiena Kristo kilia yuñae kome inu sanene, sa naña naga pisa. ¹⁰ Sanene, vena kila kiena kia imi ve keviu manene laa sane, netam̄an sane nekekaran malumuena la se tasneu, pona avisu viowa e inu, pona nelual pog m̄arera lala, pona akila kare inu, pona neva nowarpoyo e sur viowa lala, komin naña nekilia sane pogos naña yepeu malumu, Kristo ga yoko kila nom̄arera.

¹¹ Suwala! Nesitom̄al ke visena la naña nepisayu e yo nini, nepisu sane lelaga, nepisi sa naña nepe wowe pañisi. Aviewo inu, ana po m̄ena ga naña apisu kilale sane amiu ke narui naña akila nepisi sanene. Nesitom ke nesape amiu ke narui yoko asum̄a avisayu ruru inu, naña akekaran sur wo la naña nekila pan amiu rui, ana peraga, asum̄a apisa kare ruru inu nena ga. Nekilia nesape in na nepe sur korena ga, ana pe nesitom re nesape in na nepiowa taulu nalologena navisokanen tañena la poli, ana vanon ya ne asum̄a amieluar la sanene?

¹² Popon asitom̄al si sur la naña nekila likan amiu, naña pisawal inu sape in ke narui nepe nalologena lelaga. Sila ga, kiau sitomena piavi ruruia vena yuñae malumu amio amiu, a nekila amiu apisu kile lala, amio sur nailanena lala, amio kile lala na nam̄areraena kiena ne Ntewa. ¹³ Nekila sur make ga pan amiu po pañisi, maran

taaga e ya naña nekila pan sumãare taþena lala, ana la pe apismumun re sur tai poli, ana amiu na apis liu wa. Sur ga tai naña nekila nemio la ana pe nekila re nemio amiu poli, pe nepiun amiu re poli nesape avisuar inu pona aiila inu, sa naña la akila, ana pona nane nekila pal e nene yo? Visae ve sanene, aviewo inunia, komin naña visae pona neviun ga sur ve moki vetan amiu vera na yoko akekaran in ga na wa?

¹⁴ Pogaga, nagane narui nesumã nekila ruru ke nesape neiñasu nevisu amiu sina, naña kana yam telu ne narui. Nepisaar nesape yoko ve nekila re yumãena van amiu, komin naña ve neiñasun re vena kiamiu sur la iila inu, a neiñasun vena neiila amiu. Nanene sane ata lala a auya lala amio narila lala, naña pe yumãena kiena re nin sisi la poli naña avisuar kiela yermarua lala, ana yermarua ke la narui monar avisuar ruru narila lala, ¹⁵ ana visae sanene, in na nekekaran ga naña nekian make kiau suria, amio mñena kiau malena, vena iila amiuena. In na nekilia nekila sanene komin naña sineu sii amiu manene paþisi, ana nemloge piowa komin naña nepisu sane pog naña kiau sinesiena e amiu sumã pa manene ke metava, ana kiamiu sinesiena e inu sumã pito lilue ke ga tano. ¹⁶ Nepisa nanene komin nemloge visena taþena e amiu. Asumã apisu kilale ke asape pogos naña nesike nemio amiu, pe nekila re yumãena tai mñarera pan amiu ve navisuarinena poli, a pe nakan re nena kamiu kilavaru poli, ana sitomena tai teke ga e amiu wa. Amiu apisa apisape in na nepe manmarua po e lepas nakilakotaliaen

yaru, ana asitom ke asape nesumã nekila vinaun ke mrapa na visa kotalia amiuenta vanon kiamiu sur lala. ¹⁷ Ana pe sa re nena nene poli p̃isa. Asitom ruruli la naã nepitetalia la apimãs pun amiu. Apisu naã akila kare amiu e sur tai, pona aãar kiamiu sur laãasa pe kiau? Pe nesitom re poli. ¹⁸ A sanapen m̃ena pogos naã nomãreran Taetas sane naga amio kieta puruvi taãena nene, lalua monar amãlavin amiu? Apisu naã lalua akilakokanin ga naã awar kiamiu kilavaru laãasa? Peraga, komin imimi sane p̃egas taaga ga, naã Ninuna taaga ga sike e imimi, a mesumã metaveve mrapa na yumãena taaga ga, naã pe mesitom re nena naã nakilaen yumãena kiena Sup̃e vena mowar sur laãasa ve kiamimi.

Pol sitom manene paãisi sape pogos naã va gar Koren yoko ve sanape?

¹⁹ Nesumã nepisayu ke kiau yumãena la sanene, pona asitom ke asape noãpikeyon nek-ilalua kiau kia va metava e maramiu yo vena ve asitom re si viowa e inu. Ana peraga, in na pe nesitomãl inu re poli, ana nesumã nesitomãl amiu ga, a visena la naã nepisa, nepis sane yar kiena Kristo tai, e marana Ntewa, vena iilaen kiamiu malena. ²⁰ Nepisa visena la nene komin nemarau paãisi sane pe pon re naã nomãlavin si amiu poli, ana nevisu naã amiu asike e yo tai naã piowa paãisi e kiau sitomena, a nemaraun m̃ena ga sa p̃isi yepemiu mavin inu. Visae ve sa nene kilia kila sane teveveyun ita, pona tesitom ita viowa, pona sineta kar ita, pona ve tesitom re si yar taãena ana tesitomãl ita ga veve

taaga. E pogos la ne sanene, yar kilia viueli, kilia vismumun yar tařena, kilia vis vilave, a kilia mřaga manene mřena ga. Visae va sanene, ana viowa narui. ²¹ A nemaraun manene mřena ga sane pogos nařa nowasuře si neim pun amiu la nene, yoko nevisu kiau yuřaena lala e amiu sane aviowa ruru make nenaga. A visae ve sa nene, yoko kila inu nemawan Ntewa vařisi, yoko kila inu neloge sane naga mligan inu nepito tano keviu pařisi e maramiu. Ana nepisu sane yoko monar ve sa ga nene narui, komin pupia mlamulena viowa nařa amiu lařasa asumřa akila ke ne naga pe řelaga na kororaki na kolau nařa kilaro navisaluaena nařa Ntewa mligan pa yermřene amio sira vena atavevea, a pe apilon la re nena ea řisa, ana amiu atařan ga nařa la asumřa akila.

13

Visena maro na weřege laena

¹ Erau lala, sa nařa nepisa ne, nanene yam telun nařa nemialoro nařa yoko nekila vena neimi neyalial li mřa amiu, a pona yoko yam ve telun nařa nevisi van amiu komin napiowaena nene. Nanene kila narui nesitořal visena tai na Tus Wa nařa pisa sanini, sape

“Pogos nařa apa kumali apis pa yar tai vanon mlamulena viowa tai, monar yar ve lua pona ve telu nařa akilia avisawal mlamulena viowa nene, vena kila sane avisu sane lelaga.”

Naw 19:15

² Nesitořal nene komin pogos nařa nepim řesan nořarpoyo pun amiu yam lua nanua sumo

ne, nepis nemio amiu la naþa akila mlamulena viowa nene, nanene naga pogos naþa nekila þesania. A nagane nesuþa nepis ke sina ga yam lua pan la e maki nini, a visae neim nevis sina, naga nene kila kana yam telu nena. A sineun nesape nevisa van la nene, amio la naþa asike e yepas nela, visae neiþasu nevis sina, nanene yoko ve nasineyeena to re si e inu narui, yoko neliþere la e nakoena m̃arera tai. ³ Amiu asuþa apisa ke asape popon nekilologia inu towe m̃aga sane ve lelaga naþa Kristo suþa pis ke þarpoyo e kiau visena lala, ana visae sinemiun sanene, popon aim ayagagon inu e poglis nene, ana yoko avisu ga na wa. Yoko avisu sane pogos naþa Kristo sinenan kilaen kiena yuþaena e amiu, naga pe malum re nena ga, ana naga kilia yuþae amio kiena m̃areraena make ga. ⁴ Pogos naþa aþear naga mare e laki torovia, tepisu naþa tasnena pimi malumu nenaga, ana pogos naþa suþalu e marena mali sina, naga pule ruru nenaga e m̃areraena kiena ne Ntewa. Ana imimi m̃ena memalumu sane naga, ana pogos naþa mekila kiena yuþaena naiila amiuena, mesuþa memiyuþae ke memio m̃areraena naþa Ntewa taþan pan imimi.

⁵ Sineun m̃ena nevisawal nesape nevisu sane amiu asuþa amlipere inu manene laa, ana sanape narui, taþatete naþa amiu ga akilia alipere amiu re sina, sane kiamiu viawaena suþa m̃arera ke ga wa pona sanape? Avisu ruru amiu, sane asuþa apisu kilale ke sane Yesu Kristo suþa miyuþae ke e kiamiu malena wa,

pona peraga? A visae peraga, pona laḡasa asike nena e malena naḡa Suḡe pe su re nena e poli, a pe ape nalelagaena re naḡa pe lelaga poli. ⁶ A visae pogos tai visae sinemiun avisuveve mḡena kiamimi malena, naga pogaga, ana sineun manene paḡisi sane yoko avisu kilale naḡa Suḡe sumḡa miyumuḡae ke e kiamimi malena ana pe mekila pal re kana nin kinakinas tai poli.

⁷ A mesumuḡa memlen ke pa Ntewa vena yumuḡae e kiamiu malena vena amiu mḡena ve akila pal re suri tai. Visae ave sanene, yoko kilia kila mḡena kiamimi kia wo, komin imimi ke narui mepian amiu, ana pe memlenwo amiu re poli komin ga kiamimi kia. Visae yar lala avisu sane memiyumuḡae piowa sanape, nanene na pogaga, ana kiamimi pupia sitomena, sinemimin naḡa asumuḡa akilalue ga mesmes silaga. ⁸ A imimi mḡena ga, sinemimin naḡa kiamimi yumuḡaena make ga mesmes ga e visena lelaga kiena Suḡe, ve sinemimin re si kilaen sur tai naḡa welua si kiena visena lelaga vito tano. ⁹ Mesumuḡa memiyumuḡae kiena ke ga, a visae pogos tai kila imimi meim memalumu, mekekarana ga, komin naḡa mekiliana mesape pogos naḡa meim memalumu, ana amiu aim amḡarera. Mesumuḡa memlotun ke ga na nene, sane yoko asumuḡa aimi awo manene silaga. ¹⁰ Sitomena ne nanene kila nesiri mḡaki nene piḡasu pan amiu nagane e pogos naḡa nesike perinan amiu wa. Sineun nesape alogearia, a visae akila, yoko pogos naḡa neiḡasu taḡatete nevis mḡarera van amiu. Suḡe mligan amiu e lumḡau vena nevisuar amiu, pe

nakila kare amiuen re poli, ana nakila amiuenta
ava metava. A visae neiñas nevisu ve sanape,
yoko monar nekila m̃arera van amiu e ga e ya
naña mesmesun nekila.

Pol pisa pokolemalo pan la

¹¹ Erau lala, nepim e kiau visena maro narui,
nevisa ga pokolemalo van amiu. Awis, akilali
naña akila ruru kiamiu mrapa mesmesu. Alo-
gear ruru suri la naña nepiun tan amiu. Amiu
punu ga atañan ga aviranar amiu e sitomena
wo tai. Asururu ga e ðelaga namalumena, ana
yoko Ntewa na sinesiena a na sum̃arena sike
amio amiu. ¹² Pogos naña asuñã avitawe amiu,
atalopan ruru amiu, aviran pipimiu e kekarena
wa. ¹³ Nalelagaena wa lala nae e nini apisa m̃ena
kiela pokolemalo pan amiu.

¹⁴ Ana kiau leniena nesape yoko lemamiena
kiena kieta Suþe Yesu Kristo, amio sinesiena
kiena ne Ntewa, amio þaþagena kiena Ninuna
Wa, asike amio ita make ga.

Inu na, Pol.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

ee028e1c-7e53-571d-8041-681daaf580e8